



Inatsisartunut ilaasortaq Naaja H. Nathanielsen
Inatsisartut
/Maani

§ 37 nr. 27-mut akissut

Aktiaateqarluni ingerlatseqatigiiffiit Namminersorlutik Oqartussanit tamakkiisumik ilaannakortumilluunniit pigineqartut pillugit itisiliilluni apeqqutit arlaqartut Naalakkersuisunit tiguneqarput. Ingerlatseqatigiiffinnik aqutsineq piginnittuunerlu pillugit isumaliuutit eqqarsaatillu aallartinneqarallartut saqqummiutissallugit periarfissiineq Naalakkersuisut aallarniutigalugu qujassutigissavaat.

26-02-2014
Suliap nr. 2014-095736
All. nr. 1490324

Postboks 1015
3900 Nuuk
Oqarasuaat (+299) 34 50 00
Allakkasuartaat (+299) 32 50 02
E-mail: govsec@nanoq.gl
www.naalakkersuisut.gl

1.

Aktiaateqarluni ingerlatseqatigiiffiit pisortanit pigineqartut pillugit piginnittut iloriusissaannik suliarinnittoqartarnissaanik Naalakkersuisut siuliisa pilersaarutaat Naalakkersuisut nangippaat. Kisiannili Namminersorlutik Oqartussat aktiaateqarluni ingerlatseqatigiiffiutaat pillugit ukiumoortumik nassuiaammi Naalakkersuisut allapput ingerlatseqatigiiffiit Naalakkersuisut suliniutaasa allat assinginik annertuumik suliaqartartut salliutillugit piginnittut iloriusissaannik suliarinnittoqaqqaassasoq. Naalakkersuisut suliniutaat sorliit aammalu ingerlatseqatigiiffiit sorliit eqqarsaatigineqarnersut erseqqissarneqassasoq kissaatiginarpoq. Tamatuma saniatigut paaserusuppara ingerlatseqatigiiffinnut tamanut piginnittut iloriusissaasa qaqugu suliarineqarsimanissaat naatsorsuutigissaneripput.

Akissut:

Naalakkersuisut aallaqqaamut aktiaateqarluni ingerlatseqatigiiffiit annersaat tallimaasut Tele Greenland A/S, KNI A/S, Royal Greenland A/S, Illuut A/S, INI A/S kiisalu Royal Arctic Line A/S pingaarnerutillugit piginnittut periusissiaat eqqarsaatigalugit qitiutillugit samminiarpaat. Piginnittunut najoqutassiat taakku ilusilersornerinik suliassat annertupput, inunnik aningaasanillu pisariaqartitsisuullutik. Sulisut killeqarmata sulisorisallu aallaavigalugit suliassat pingaarnersiorneqarneri eqqarsaatigalugit, piginnittunut najoqutassiat tamakkerlugit siunissami ungasilaartumi aatsaat piareernissaat naatsorsuutigineqassaaq.

2.

Nassuiaammi Naalakkersuisut allapput illuatungaatigut ingerlatseqatigiiffiit patajaallisarnissamik pisariaqartitaasa aammalu nutaamik aningaasaliinissamik pisariaqartitsinissamut naatsorsuutigisat illuatungaatigullu aktiaatillip iluanaarutissatut naatsorsuutigisaasa akornanni oqimaaqatigiissitsineq iluanaarutissanik uuttortaanermi pingaarnertut pisartoq. Tamatta ilisimavarput ingerlatseqatigiiffiit pisortanit pigineqartut amerlasuut aserfallatsaaliinerit eqqarsaatigalugit annertuumik suliassaqartut nutaamillu aningaasaliinissat pisariaqartikkaat. Peqatigisaanillu Nunatta Karsia iluanaarutininik pisariaqartitsivoq. Nunatta Karsiata siunissaq ungasinnerusoq isigalugu iluanaarutininik pisariaqartitsinera millisarneqaqqullugu Naalakkersuisut qanoq takorluugaqarpas? Iluanaaruteqarnissamik ingerlatsineq allanngortinniarlugu tigussaasumik pilersaaruteqartoqarpa?

Akissut:

Aktiaateqarluni ingerlatseqatigiiffinnut Naalakkersuisut aningaasarpassuarnik aningaasaliissuteqartarput pissusissamisoorporlu aningaasaliissutit iluanaaruteqarfiunissaat naatsorsuutigissallugu. Taamaattumik nunap karsiata iluanaarutininik pissarsiarisartagaasa annikillisarnissaat takorluugaanngilaq, inuiaqatigiinnili suliassat, ingerlatseqatigiiffiit namminersorlutik oqartussanit pigineqartut amerlanersaasa aamma nammataat eqqarsaatigalugit, ingerlaavartumik qaffasissusiliisalernissaq takorluugaalluni.

Aktiaateqarluni ingerlatseqatigiiffiit namminersorlutik oqartussat pigisaat tamakkerlugit piginerinut najoqqutassiornissaat Naalakkersuisut naatsorsuutigaat, taakkunani ilaatigut ilanngunneqassallutik pisariaqartumik aningaasaliissutissanut akiliutissat, aningaasartuutit appasissuutinnissaat qulakkeerniarlugu pitsaanerpaamik aaqqissugaanissaat aammalu pilersuinerup isumannaatsuunissaa kiisalu iluanaaruteqartarnerit ingerlaannarnissaat. Ingerlatseqatigiiffiit tamarmik immikkut unammilligassaqarput taamaattumillu piginnittunut najoqqutassiat ingerlatseqatigiiffinnut immikkut ataasiakaanut naleqqussarneqassallutik.

3.

KNi A/S-ip qullersaqarfiani piisaapiluttoqarsimaneratut ittumik ingerlatseqatigiiffinni pisortanit pigineqartuni allani pisoqarsimannginnera Naalakkersuisut qularnaveersinnaavaat? Ingerlatseqatigiiffinni pisortanit pigineqartuni

piisaapiluttoqartannginnissaa anguniarlugu Naalakkersuisut tigussaasumik qanoq iliuuseqalersaarpat?

Akissut:

Naalakkersuisut erseqqissarusuppaat aktiaateqarluni ingerlatseqatigiiffinit pisortanit pigineqartunit naatsorsuutigisat tassaammata ingasaassinaveersaarnissaq aammalu aningaasatigut pisariillisaaneq suliassat pingaarnit ilagimmassuk. Naluneqanngitsutut ingerlatseqatigiiffini ingerlatsinermut tunngasunik Naalakkersuisut aalajangiisinnaanngillat, taamaallaalli siulersuisunut tassunga tunngasunik siunnersuisinnaallutik ersarissunillu najoqqutassiisnaallutik. Ingerlatseqatigiiffinik aqutsilluarnissamut najoqqutassiatigut, siulersuisuusut qanoq pissusersortarnissaannik takorluukkat Naalakkersuisut ersarissareerpat.

4.

Naalakkersuisut allapput ingerlatseqatigiiffini pisortanit pigineqartuni ukiuni kingullerni tallimani sulisunik ikilisaaneq pisariillisaasoqarsimaneranut takussutissaasinnaasoq atuisut akiliutigisartagaasa appasinnerulerannut pissutaaqataasinnaalluni. Naalakkersuisut ukiumoortumik nassuiaataannit erserpoq ingerlatseqatigiiffini aningaasarsiat tamarmiusut 2008-mi 1.630 mio. kr.-init 2011-mi 1.582 mio. kr.-inut apparsimasut. Appariaat 2%-iulluni. Piffissami pineqartumi tassani sulisut amerlassusiat 5.732-nit 4.992-inut apparsimavoq. Appariaat 13%-iulluni. Piffissami pineqartumi tassani Namminersorlutik Oqartussat ingerlatseqatigiiffiutaanni agguaqatigiissillugu aningaasarsiat tassa 12,5%-imik qaffariaateqarsimapput. Akissaatit nalinginnaasumik qaffannerinnaannik aamma/imaluunniit sulisunik aalajangersimasunik immikkut ittumik isumagineqarsimanerannik ineriartorneq tamanna pissuteqarnerisut Naalakkersuisut nassuiarsinnaavaat? Akissaatit qaffannerisa ingerlatseqatigiiffiit pisortanit pigineqartut unammillersinnaassusiannut sunniutaat pillugit Naalakkersuisut qanoq eqqarsaatersuuteqarpat?

Akissut:

Sulisut aammalu akissarsiat katinnerisa appariaateqarneri, sulisut sinneruttut suliassaqarnerulerinik taamaalillutillu agguaqatigiissillugu akissarsiaasa qaffariaateqarnerinut takussutaasinnaavoq. Ineriartornerup kingunerisaanik imikkoortut ataasiakkaat qanoq eqqorneqarsimaneri immikkuullarissumik akissuteqarfigiuminaappoq. Taamaattorli tammaattoqarsimanngitsoq Naalakkersuisut nalilerpat. Akissarsiat

qaffannerisa sunniutaat ingerlatseqatigiiffiit pisortanit pigineqartut unammillersinnaaneritut annertuumik pingaaruteqarsinnaasut Naalakkersuisut nalilerpaat. Taamaattumik naatsorsuutigineqarpoq siulersuisut pisortaasullu ingerlatseqatigiiffiit tunisassiorsinnaassusaannik naammassisaqarsinnaassusaannillu ingerlatseqatigiiffinnut nunarsuup immikkoortuini allaniittunut sanilliuksilluni ataqatigiisaakkamik misissuisarnissaat nalilersuisarnissaallu ingasaassinaveersaarnissaq ingerlaavartumik qulakkeerniarlugu.

5.

Illuut A/S pillugu Naalakkersuisut allapput ingerlatseqatigiiffik "aqutsinikkut unammilligassaqarpoq aammattaaq naatsorsuusereriaatsimut sunniuteqartunik." Tamatuma itisilerneqarnissaa kissaatiginarpoq.

Akissut:

Illuut A/S-ip maannakkut pigisai 1,1 mia. kr. sinnerlugit naleqarput maannakkullu tassaalluni aktiaateqarluni ingerlatsigiiffiit, Namminersorlutik Oqartussat pigisaasa, annersaasa tullia, pigisat naliinut uuttorlugu. Illuut A/S maannakkut ingerlanneqarpoq pisortaanerit, Namminersorlutik Oqartussanit attartortinneqartunit. Ingerlatseqatigiiffiup illersorneqarsinnaasumik pitsaasumillu ingerlanneqarnissaata qulakkeernissaa Naalakkersuisut suliniutigaat. Ingerlatseqatigiiffiup angissusia, suliai aammalu taarsigassarsisitsisunut pisussaaffii eqqarsaatigalugit Naalakkersuisut ilisimatinneqarput, Illuut A/S-ip siulersuisuisa isumaliutigigaat pisortaanerit Namminersorlutik Oqartussanit avissaartinneqarnissaat Naalakkersuisunut inassutigissallugu.

Illuut A/S-ip massakkut aaqissugaanerani tunngavigineqarpoq pisortarisat Ineqarnermut Naalakkersuisoqarfimmit, inissianik sanaartormik pingaarnertut suliaqartumit attartortinneqarneri. Sanaartukkat tunniuttarneritut atorneqartalerinullu atatillugu suliassat aamma ingerlatsineritut tunngasut amerliartorput. Ingerlatsinerimi sanaartukkat attartortittakkallu amerlereermata, pisariaqartumik nakkutilliineq malitseqartitsisarnerillu ingerlassinnaaniarlugit naammassisinnaaniarlugillu ingerlatseqatigiiffimmi pisortaanermik suliassaqqarfinnilu sulisunik naleqquttunik atorfinitsitsinissaq naleqquttuussaaq.

Tamanna Ukiumoortumik Naatsorsuutit 2012-imut Kukkunersuisut nalunaarutaanni qupp. 21-mi kukkunersuisup erseqqissaavigineranik malitseqarpoq:

"Soorlu akuersinermik nalunaarutitsinni oqaatigineqartoq, ingerlatseqatigiiffiup ukiumoortumik nalunaarutaani kukkunerit pingaarutillit pinaveersaartissinnaaneritut siullermik tunngaviussaaq, ingerlatseqatigiiffiup naalunaarsuineritut aqqissuussaasa suleriaasiisalu aqqissugaaneri suliffeqarfiup iluani isumannaatsumik nakkutilliinikkut qulakkeerneqarnersut.

Ingerlatseqatigiiffiup naatsorsuusiortarnermut tunngatillugu sulissai avataani suliffeqarfimmit isumagineqarput, taamaattumillu naatsorsuuserinermut pissusissamisoortumik suliassat ingerlatseqatigiiffiup ulluinnarni suliaanut ilaanatik. Tamassuma malitsigisaanik suleriaaseqanngilaq, suliffeqarfiup iluani isumannaatsumik nakkutilliinermik qulakkeersussamik taamaattoqarnikkullu malinnaatitaasunik eqqortunillu naatsorsuusiornissaq qulakkeerlugu.

Ingerlatseqatigiiffiup ulluinnarni suliaanut tunngasunik ulluinnarni oqaloqatigiittannginnerup ingerlatseqatigiiffiup ingerlaavartumik naatsorsuusiorterani taamatullu ukiumoortumik naatsorsuusiorterani kukkunissamut aarlerinaatillit annertunerulersippai, tamannalu ilaatigut 2011-mi illuutigisat ilanngullugit naatsorsuutitut ikkunneqarsimannginneri siuliani pineqartuni takuneqarsinnaalluni.

Maannakkut oqaatigineqarsinnaavoq, assersuutigalugu qaammammoortumik oqimaaqatigiisitsinikkut il.il. avataani naatsorsuuserivimmit ingerlaavartumik nalunaarusiat, ingerlatseqatigiiffiup suliai ingerlatsineralu eqqarsaatigalugit malinaasinneqanngillat eqqortuunatillu. Tamanna ingerlatseqatigiiffiup akiligassarsisarfinnik il.il. suleqateqarnera eqqarsaatigalugu aarlerinaateqartutut nalilerneqarpoq.

Siuliani allassimasut tunngavigalugit inassutigaarput, ingerlatseqatigiiffik illuutitut angissusilik ingerlatsinermik immikkoortortaqarfilerlugu taamatullu naatsorsuuseriveqartillugu aqutsisoqarfeqassasoq, ulluinnarni qanimut suleqatigiittussanik."

Taamaattumik taamatut inissisimaneq iliuuseqarfigissallugu pisariaqarpoq, aammalu qaninnerusoq eqqarsaatigalugu iluarsisoqartariaqassaaq, Illuut A/S-ip ingerlaannarsinnaanissaa qulakkeersinnaajumallugu. Tamanna pingaartuuvoq, aningaaseriviit taarsigassarsisarfillu ingerlatseqatigiiffimmik tatiginninnerat attatiinnarneqassappat.

Naalackersuisut Ingerlatseqatigiiffinnik Allattoqarfik pisinnaatippaa ingerlatseqatigiiffiit namminersorlutik oqartussanit tamakkiisumik ilaannakortumilluunniit pigineqartut, A/S Inissiatileqatigiiffik INI aamma

Illuut A/S ilanngullugit pillugit, piginnittunut najoqqutassat oqaasertalersorlugit siunnersuusiorlugit suliassat aallartinnissaannut. Siunissami iliuuserisassanik taakkulu angusaqarfigisassaannik inassutinik piginnittunut najoqqutassiat imaqqassasut naatsorsuutigineqarpoq.

6.

Immikkut ittumik Illuut A/S-imut qanittumik attaveqarnissaq Naalackersuisut kissaatigaat. Taamaammat siulersuisui tassaapput Naalackersuisoqarfiit pisortaat pingasut. Atorfillit pingasut siulersuisuutinnikkaluarlugit qanimut attaveqarusunneq anguneqarsinnaannginnami? Aalajangiineq tamanna qanoq ililluni siulersuisuni ilaasortat suliassamut pikkorissuseqarnerat tunngavigalugu toqqarneqartarnissaannik Naalackersuisut kissaataannut ataqatigiippa? Ingerlatseqatigiiffiit pisortanit pigineqartut akornanni Illuut A/S ilanngaasikkanik ernialersukkanik akiitsoqarneraavoq. Tamannaluunniit kisiat pissutigalugu immikkut aqutsisuuliinissaq professioneliusumillu siulersuisuliinissaq isumalioqqutigineqartariaqarpoq.

Akissut:

Illuut A/S Namminersorlutik Oqartussanut akissaqartitsiniarnermi sakkussatut taamaallaat kisimi pilersinneqarpoq. Inissianik sanaartornermik Namminersorlutik Oqartussat aallartitsisinnaaneri, 2/3 miss. Namminersorlutik Oqartussat taarsigassarsiutaannik aamma 1/3-mik taarsigassarsianik akilerlugit, Illuut A/S-ip pilersinnerata periarfissaqalersippaa. Periarfissaq alla tassaavoq Namminersorlutik Oqartussat suliniutinut 100 %-imik akiliinissaat. Tamanna isumaqarpoq, aningaasanut inatsimmi aningaasaliissutaasut atorlugit inissianik amerlanernik sanaartorsinnaanermik. Suli allat pissutsit imaapput Illuut A/S namminersorluni pilersaarutinik aallartitsisinnaanani. Pilersaarutit Aningaasanut Inatsimmi akuersissutigineqartut taamaallaat Illuut A/S-ip aallartissinnaavai.

Taamaattumik siulersuisut Aningaasaqarnermut Naalackersuisoqarfimmi, Ineqarnermut Naalackersuisoqarfimmi aamma Siulittaasup Naalackersuisoqarfiani pisortatut issiasunik qaqugukkulluunniit inuttaqarneri isumatusaarneruvoq, taakku pilersaarutinik Inatsisartunit akuerineqartunik taamaallaat aallartitsisoqartarnissaa qulakkeersinnaammassuk. Tamatuma saniatigut Naalackersuisut naalackersuinermi tunaartaasa naammassineqarnissaat qulakkeerneqarsinnaavoq - tamanna assersuutigalugu isumaqarluni

illuutigisat sorliit tunineqarnissaannik, tunisinermi suut piumasaqaataassanersut ilanngullugit tamakkiisumik aqutsisinnaaneq. Inaarutaasumillu ineqarnermut akiliutit qaffasissusaat tamakkiisumik aqunneqarluni.

Inuussutissarsiuteqartunik siulersuisoqarnissaq pisortaqaarnissarlu toqqarneqarpat, tamassuma malitsigisaanik naalackersuisoqarfinni pisortaanerit tunuassapput, taamatullu siulersuisunit nutaanit pisortaneq atorfinitsinneqarluni. Illuut A/S pillugu piginnittunut najoqqutassiornermut atatillugu isumaliutigineqartoq pingaarneq tassaavoq, tamakkiisumik inuussutissarsiornerpalaartunngornissamut ingerlatseqatigiiffik ullumikkut piareersimanersaq, imaluunniit ingerlatseqatigiiffik Naalackersuisunut Inatsisartunullu qanimut suleqateqarluni ingerlaannassanersaq. Allatut oqaatigalugu Naalackersuisut Inatsisartullu tamanik aalajangiisartuujuassappata, inuussutissarsiutilinnik siulersuisoqarnissamut pisortaqaarnissamullu akissaaajassalluni tunngavissaqanngilaq.

7.

Nukissiorfiit aktiaateqarluni ingerlatseqatigiiffinngortitaanissaanni pitsaaqutit ajoqutillu pillugit misissueqqissaarnerit qaqugu inaarsarneqassasut Naalackersuisut naatsorsuutigivaat?

Akissut:

Nukissiorfiit aktiaateqarluni ingerlatseqatigiiffinngortinnerani iluaqutissat ajoqutissallu pillugit nassuiaatit marsip naanerani Inatsisartunut tunniunneqarnissaat naatsorsuutigineqarpoq.

8.

Naalackersuisut isumaqarpat Great Greenlandip uninngasuutai ammit ikiliartortuarsinnassasut? Isertitat atukkallu oqimaaqatigiilernissaat angutserlugu akit atuuttut tunisallu qanoq katitigaanerat atuuttoq attallugit Great Greenland ukiumut amernik qassinik tunisaqartariaqartassava? Ammit uninngasuutit nalingata piviusorsiornerusumik nalilerlugu appartinneqarnera naammattoq Naalackersuisut isumaqarpat, qaffasissuserlu tamanna piviusorsiorortoq ingerlatseqatigiiffiup siunissami kiffartuussinissamik isumaqatigiissusiortarnissaanut sulilu

aningaasaliffigineqarnissamik pisariaqartitsisinnaaneranut sunniuteqassava?

Akissut:

Ammit amerlassusii siunissami suli appariartussasut Naalackersuisut nalilerpaat. 2011-mi ammit uninngasuutit 269.000-iupput, 2012-imi ammit 200.000-iullutik taavalu 2013-imi ammit 130.000-iullutik. 2014-imut missingersuutit takutippaat, naatsorsuutigisamik kaavijaartitat 27 mio. kr.-iussasut katillugit angusat tassaassallutik 500.000 kr. missaanniillutik. Taamaattumik ukiualuit ingerlanerini imminut akilersinnaasumik ingerlatsisinnaanissaq ilimagineqarpoq.

Uninngasuutit nalikillineri 2014-imi immikkut nalikilliliinermik ilaneqassapput kiisalu ingerlatseqatigiiffimmut aningaasartuutit 4 – 5 mio. kr. missaanniittut immaqa akilerneqassallutik.

Ukiuni aggersuni sullissinermik isumaqatigiissut pisariaqartinneqassaaq, Copenhagen Fur aqqutigalugu amminik amerlassusileriiikkanik nioqquteqarnissaq pillugu ingerlatseqatigiiffik isumaqatigiissuteqarmat taamaasillunilu piniartut tunitsivinnut tunisisarnissaat pisariaqartuassalluni. Akit qaffakkiartoqqilerput, kisianni ammit passunneqanngitsut matussusernissaannut naammannatik.

9.

Ukiuni tulliuuttuni tallimani Greenland Oil Spill Response A/S-ip ineriartornissaa Naalackersuisut qanoq ilimasuffigivaat? Ingerlatseqatigiiffiup niuernikkut tunngavigaa akiliuteqartitsilluni aatsitassarsiornermi ingerlatsivinnut oliaarluinnernik salinernut atortunik atugassanngortitsisarnissaq. Ukiuni aggersuni sinerissap avataani annertuumik ingerlatsisoqarnissaa ilimagineqanngimmat Greenland Oil Spill Response A/S-ip aalajaallisarnissaa Naalackersuisut qanoq ilimasuffigivaat, aamma ingerlatseqatigiiffik qanoq angusaqarluarusussuseqarfigineqarpa?

Akissut:

Kalaallit Nunaata kitaata sineriaani ukiut tulliuuttut tallimat ingerlaneranni uuliakoomernut ilaatigut kajumissutsiminnik upalungaarsimasussat Greenland Oil Spill Response A/S-ip (GOSR) siuarsarsimassagai naatsorsuutigineqarpoq, uuliakoortoqarnerani Kalaallit Nunaata sineriaanni pinngortitaq pitsaanerpaamik illersorsinnaaniarlugu, aammalu taamaaliornikkut uuliakoornermik pisoqassagaluarpat Kalaallit Nunaata avataanit ikiorserneqarnissamik pinngitsuuisinnaannginnera

amnnikillisarniarlugu. GOSR-ip ilaasortarisaminut maannakkut tassaasunut uuliasiornermik ingerlatsisunut siunnersuisarnikkut sullissinini annertusassagaa taamatutaaq naatsorsuutigineqarpoq.

2014-imi avataani immami uuliasiornermik suliat annertusinissaat naatsorsuutigineqanngilaq, kisianni misileraalluni qillerisarnissat 2015-2016-imi kingumut aallarteqqinissaat ilimagineqarluinnarpoq. Taamaattoq Kalaallit Nunaanni uuliasiornermut tunngasunik suliat suli annertusiartussapput maannakkullu uuliasiornermut akuersissutit 22-t tunniunneqarnikuupput taakkulu tamarmiullutik Greenland Oil Spill Response A/S pillugu Inatsisartut inatsisaat nr. 4, 4. juni 2012-imeersoq naapertorlugu piareersimanermut akiliutit aamma sullissinermut akiliutit pillugit GOSR-imik isumaqatigiissuteqarnissaminnik pisussaaffeqarput. Uuliasiornermut akuersissutit amerlassusii ukiuni 5-ini tulliuuttuni aalaakkaasuunissaat naatsorsuutigineqarpoq, taamatullu uuliasiornermut akuersissuteqarnermi suliat annertussusii ukioq 2015-imi aalaakkaasunngussasut naatsorsuutigineqarluni, tassani kitaani akuersissuterpassuit qillerinissaminnik aalajangiisussanngussallutik aammalu tassani kangiani akuersissuteqartut immap naqqani misissuinerit aallartittussanngussallugit.

Pingaartuuvoq erseqqissaatigissallugu, uuliasiorluni qillerinermut atatillugu uuliakoornissamut upalungaarsimanissaq kisimi pingaaruteqartuunngimmat, aammali tamanut tunngatillugu avataani uuliasiornermut sulianut atatillugu pingaaruteqarmat, tassani angallatit arlaata uuliakoorsinnaanera tamatigut annikitsumik aarlerinaateqartarmat, taamaattumik Greenland Oil Spill Response A/S pillugu Inatsisartut inatsisaat nr. 4, 4. juni 2012-imeersoq Aatsitassanut inatsit naaperlugu akuerisaasunik allanik suliaqartoqarnerani, umiarsuarnik angalasoqartillugu, assersuutigalugu saviminissamik assartuinermi, atorneqarsinnaavoq. Ilutigitillugu Naalakkersuisut aamma neriuutigaat kalaallit suliffeqarfiisa Kalaallit Nunaata imartaani suliaqartut naak tamanna inatsisitigut pisussaaffiunngikkaluartoq GOSR-imi ilaasortanngornissap isumatusaarnera aamma paasiumaaraat.

GOSR-ip suliffeqarfik namminersortoq ingerlatissavaa taavalu ingerlatseqatigiiffiup niuerneq imminut napatissinnaasoq ingerlassinnaaleruniuk, Greenland Oil Spill Response A/S pillugu Inatsisartut inatsisaat nr. 4, 4. juni 2012-imeersumi § 4 naapertorlugu "... *ingerlatseqatigiiffimmut pingaarnertut anguniagaavoq, ukiualuit ungasinngitsut ingerlanerini ingerlatseqatigiiffik tamakkiisumik ilaannakuusumilluunniit namminersortunngortinneqassasoq..*". Suliffeqarfinnik namminersortunik ingerlatsinissaq Naalakkersuisut

suliassarinnngilaat kissaatiginagulu, taamaattumillu Namminersorlutik Oqartussat ingerlatseqatigiiffiup pilersinneqarnerani aamma Kalaallit Nunaanni uuliakoornermut upalungaarsimaniarnermut ingerlatseqatigiiffeqarnissaanik siunertaq naammassineqarnerini akulusimanerat millisinneqartariaqassalluni.

10.

KNI A/S-ip namminermi naatsorsuutai kingulliit perusuppakka PolarOil-ip, Pilersuisup Neqillu immikkut naatsorsuutaat takuneqarsinnaaqullugit. Tamakku avammut saqqummiuteqqusaassanngippata qinnutigissavara naatsorsuutit Inatsisartut Aningaasaqarnermut Ataatsimiititaliaannut aammalu Kukkunersiunerimut Ataatsimiititaliaannut nassiunneqassasut?

Akissut:

Ukioq naatsorsuusiorfiusoq 2012/13 pillugu KNI A/S pillugu ukiumoortumik nalunaarusiaq tamanut saqqummiunneqartoq kingulleq akissummut uunga ilanngullugu nassiunneqarpoq. (piffissaq 1. april 2012 – 31. marts 2013 pineqarluni). Ukiumoortumik nalunaarusiami tassani ingerlatseqatigiiffiup angusaasa agguataarneri takuneqarsinnaapput, Pilersuisoq, Polaroil, Allaffeqarfiit suliffeqarfiillu tassunga tunngasut ingerlatai immikkoortiterlugit. Angusani agguataarineq taanna quppernemi 49 aamma 50-imi takuneqarsinnaavoq (d) - ukiumoortumik nalunaarusiaq ilanngunneqarpoq aammalu ingerlatseqatigiiffiup nittartagaani tamanit takuneqarsinnaalluni www.KNI.gl.

KNI A/S pillugu ukiumoortumik nalunaarusiami ilanngunneqartumi pigisatut suliffeqarfimmi Neqi A/S-imi angusat oqimaaqatigiissitsinerillu ingerlatseqatigiiffiup piginnittup naatsorsuutaanut ilanngunneqarput. Taakku quppernemi 32 – 34-mi allassimapput . Taakku saniatigut Neqi A/S-ip ukioq naatsorsuusiorfiusoq 2012/13 pillugu nammineerluni ukiumoortumik naatsorsuutai ilanngunneqarput, aamma tamanit takuneqarsinnaasut.

11.

Mianersukannersumik naatsorsuinerit ilimaginninnerillu aallaavigalugit ukiuni aggersuni Nunaoil A/S qanoq amerlatigisunik aningaasaliiffiqineqassangatinneqarpa? Aningaasaliissutissatut atugassanik akiliisoqassanngippat sumik tunngaveqarluni isumalluartoqarnerata itisilernerneqarnissaa kissaatiginarpoq.

Akissut:

Nunaoil A/S Kalaallit Nunaata uuliamik ingerlatseqatigiiffiutaatut Kalaallit Nunaanni kulbrintinik ujaasinissamut kalaallit ingerlatseqatigiiffiutaanni kisiartaalluni akuersissummik pigisaqarpoq. Ingerlatseqatigiiffik aningaasaqarnermut ukiunut 5-nut siumut takussutissiortartuuvoq. Tunngavissat qanganisarsiortuunerusut aallaavigalugit NUNAOIL ukiuni 2017, 2018 aamma 2019-imi ukiut taamasa immikkut 10,0 mio. kr.-nik aningaasaliiffiqeqartarnissamik pisariaqartitsissaaq maannakkut najoqqutarisat sulisullu atorlugit ingerlatsineq ingerlatiinnarniarlugu.

Aappaagu tassa (2015-imi) ingerlatseqatigiiffiup kukkunersiuisuata – Grønlands Revisionskontor – pisussaaffigissavaa isummerfigissallugu *going concern-imik* - ajornartorsiut, tassa ingerlatseqatigiiffiup ingerlatsinerata ingerlaannarnissaa taamaaliornermilu aningaasaliiffiginissaata missingersuusiornissaa naliliiffigissallugu. Qulaani pineqartut eqqutissappata, missingersuusiorneq aamma aningaasanut inatsimmi konto 10.13.11, aktiaateqarluni ingerlatseqatigiiffinnut toqqaannartumik aningaasartuutaassapput .

Nunaoil A/S pillugu nassuiaasiornermi suliat annertuut 2013-imeersut innersuussutiqeqarputtaa, tassani ukiuni aggersuni ingerlatseqatigiiffiup sinaakkutissai aalajangerneqartarmata, nassuiaatillu Naalakkersuisut nittartagaanni Siulittaasup Naalakkersuisoqarfiata ataani nassaarineqarsinnaapput.

12.

Royal Arctic Line A/S-ip assartuinermi akinik qaffaalersaarnera inuussutissarsiornermut tamarmut pinngitsoorani sunniuteqartussaassaaq suliffinnillu atuisunillu malugineqarsinnaasumik akit qaffanneqarnerannik kinguneqartussaassalluni. Ukioq 2014 eqqarsaatigalugu Aningaasaqarnermut Siunnersuisoqatigiit nalilerpaat siuariartortoqassanngitsoq taamaalillunilu 2013-imut naleqqiulluni pitsaanerussalluni. Taamatut Aningaasaqarnermut Siunnersuisoqatigiit naliliinertik ilaatigut tunngaveqartippaat aatsitassatigut ujaasinermi annikitsumik siuariartoqarnissaanik, aamma sanaartornermi aningaasaliissutit 2013-imut naleqqiullutik annikinnerusumik apparnissaannik. Assartuinermi akinik qaffaalersaarnerit Aningaasaqarnermut Siunnersuisoqatigiit siuariartortoqarnissaanut ilimasuutaannut Naalakkersuisut qanoq sunniuteqassangatippaat?

Akissut:

Royal Arctic Line-mi aningaasaqarneq pitsaanerusoq qulakkiissallugu pisariaqartoq paasineqarpoq.

Tamanna tunngavigalugu assartuussinermut akit qaffannissaat pillugu RAL-imit qinnuteqaat akuerissallugu Naalakkersuisut toqqarpaat. Tamanut tunngatillugu akit qaffariarneri ineriartornermut annikitsumik sunniuteqarsinnaapput.

Periarfissatut alla tassaavoq assartuussinermi akit annikitsumik qaffanneri ilutigalugit assartuisarnerit akuttunerusumik ingerlanneqartalersinnaanissaat tammannali ajortumittaaq sunniuteqartussatut nalilerneqarpoq. Tamanut tunngatillugu sullissineq ajornerulissaaq inuit namminneq atuinerinut ajornerulersitsilluni. Tamannalu niuertarfinnut toqqaannartumik aningaasartuuteqarnermik malitseqassalluni nioqqutissanik kasiiliisarnerup annerulernerisigut peqqumaasivinni uninngasuutitaqarnerulerneq peqqutigalugu.

13.

Ukiualuit matuma siorna siunnersorteqarfiup Mantec Aps-ip nalunaarusiaani qulaajarneqarpoq Royal Arctic Line eqqarsaatigalugu 30 mio. kr. angullugit sipaaruteqartoqarsinnaasoq. Tamatuma kingorna suliniut taanna Ninngarummik taaguuteqartinneqartoq suliffimmi piviusunngortinneqarpoq. Tassunga atatillugu paaserusuppara amerlanerusunik isertitsisoqartoqartariaqarnera Royal Arctic Line-mi qanga ilisimaneqalersimanersoq, aammalu assartuinnermi akit qaffanneqarnissaat pinngitsoortinniarlugu qanoq iliuuseqartoqarsimanersoq? Ilanngullugu paaserusunnarpoq isertitassat amerlissutissaasa qanoq annertutiginerat suliffeqarfiup namminermi ersunneraa aammalu assartuussinermut akit naatsorneqartarneranni najoqqutassiat naapertorlugit assartuussinermi akinik qaffaanertut ilusilerlugit atuisunut qanoq annertutigisumik akiligassanngortitsisoqartariaqarsimanersoq?

Akissut:

Assartuussisarnermi akit qaffattariaqarneri qaammatit arfinillit inorlugit ilisimaneqarpoq, ingerlatseqatigiiffiup suliaqarluartarnerisa nalaani assartugassat annertussusissaat ilisimaneqalermata. Pisariaqartitsilernermut pissutaasoq tassaavoq, 2013-ini, pingaartumik sanaartornermut tunngasuni, ilaatigut 2013 pillugu Aningaasanut inatsimmi aamma 2012 pillugu Aningaasaqarnermut Siunnersuisoqatigiit Nalunaarusiaanni inuiaqatigiit aningaasaqarnerinut naatsorsuutigisat piviusunngorsimanninnerinik.

Kalaallit Nunannut nassiussukkatut akuersissutigineqartut annertussusii (tassaasut Royal Arctic Line-ip kaaviaartitaminut tunngavigisai) 2008-illi

appariartuinnarsimapput (2011 minillugu, tassani nassiussukat annertussusiinut Nuuk Center annertuumik sunniuteqartuulluni). Ingerlatseqatigiiffiup najoqqutassaa ungasinnerusumilu anguniagaa tassaavoq assartuussinermi akit sapinngisamik nikerartinnginnissaat. Ninngarut--mik suliniutit aqutugalugit 2012 ilanngullugu naammassisinnaasat aqutugalugit qulakkeerneqarpoq, sullissineq ajornerulersinnagu aammalu inuiaqatigiinni akit nikerarnerinut sanilliullugit assartuussisarnermi akit nikerarneri annikitsuutinnissaat (2011-mi 1,5%).

Ingerlatseqatigiiffiup aningaasartuutai 2013-imi annertuumik annikillipput, kisianni 2013-imi nassiussukat annertussusii siulittuutaanngitsumik malunnaatilimmik appariarlutik, kaaviaartitat 58 mio. kr.-nik appariarnerisa nalinginut, taamaattumillu akit nikerannginnissaannik anguniakkap angunissaa periarfissaqarani.

Akinik qaffaanissamik aalajangiinermi *14. februarip 2014-imeersumi* Royal Arctic Line-ip 2014-imi pisariaqartinneqartut 60 %-ii (2013-imi aningaasartuutit appartinneri aammalu 2014-imi appaanissamik pilersaarutit ilanngullugit) nammatarai, taavalu akit qaffannerisa pisariaqartinneqartut 40% inorlugit nammallugit. Ingerlatseqatigiiffiup taarsigassarsitsisumut pisussaaffii aammalu ingerlatseqatigiiffiup inuiaqatigiinnik sullissinissaanik piumasaqaatit (sap. akunnikkaartumik assartuisoqartarnissaa) pissutigalugit, tassunga tunngasut 1. januar 2015-imi tulliani akinik qaffaanermi naligiinnerulissapput. Taamaattoq naligiissitsinissamut 2014-imi nikerarnerit apeqqutaapput.

14.

Naalackersuisut nassuiaataat naapertorlugu Royal Greenlandip siunertaraa aalisarnermik ingerlatsinissaq aammalu inuussutissanik ingerlatsinerup iluani tunisassianik piareersaaneq niuerutiginninnerlu. Aalisarneq pillugu Naalackersuisut inatsisitaassaata kinguneranik maleruaqqusatigut siunertani Royal Greenlandip allanngortittariaqalissannginnerpaa? Tamanna pillugu

**Royal Greenlandip siulersuisui piginnittunit/Namminersorlutik
Oqartussanit ilisimatinneqareerpat?**

Akissut:

10/2 2013-imi ataatsimeersuarnermi ingerlatseqatigiiffiup malittarisassai, aamma siunertanut paragraffi ilanngullugu Naalakkersuisut allanngortippaat. Malittarisassat nutaat ingerlatseqatigiiffiup nittartagaani atuarneqarsinnaassapput.

Aalisarnermut inatsisissaq naluneqanngitsutut 2014-imi Ukiakkut Ataatsimiinnermut kinguartinneqarpoq. Tamanna isumaqarpoq, Nalakkersuisut aammalu Aalisarnermut, Piniarnermut Nunalerinermullu Naalakkersuisoq piffissaqalaartut, inatsisissatut siunnersuut piareersimareersoq iluarsaatissallugu. Siunnersuutip iluarsaannerani Royal Greenland A/S kiisalu tusarniaanermut atatillugu soqutiginnittut allat soorunami akuliutsinneqassapput.

Inussiarnersumik inuulluaqqusillunga



Aleqa Hammond

Naalakkersuisut Siulittaasuat